

BAKEA LORTZEKO ALDERDIAK BILDU ETA MUGARIK GABEKO ELKARRIZKETARI EKINGO DIOTELA DIO

Legebiltzarrean gehiengoa izango duen Gobernua nahi du Egibarrek

■ Joseba Egibar buruzagi jeltzaleak nahi du eratuko den Jaurlaritzak gehiengo absolutuaren babesa izatea Legebiltzarrean. Horretarako bi formula daude: bata EAJ-EA-PSE hirukoa, eta bestea popularrak sozialisten ordeiz.

Europa Press / Bilbo

JOSEBA EGIBAR GBBko lehen-dakariak berretsi egin du Juan Jose Ibarretxe hautagai jeltzaleak egin duen planteamentua; hau da, Legebiltzarrean gehiengo absolutuaren babesa izango duen Jaurlaritza dela apustua. Egibarrek, izan ere, uste du EAJ-EA biko gobernuak ez lukeela nahikoa babes izango, ahulegia litzatekeela.

«Gobernu batek indar handiz ekin behar dio. Eta horrek eskatzen du babes parlamentario nahikoa, gehiengo absolutua», adierazi zuen Radio Euskadi irratiari. Egonkortasuna eta gobernagarritasuna bermatzeko bi aukera daude: sozialistekin edo popularrekin egindako hirukoak. Kasu bietan beharrezkoak diren 38 parlamentario baino gehiago laguntza izango lukete.

Abertzaleen arteko gobernuak arriskuak izango lituzke Egibarraren arabera: «EAJ-EA gobernuak 27 legebiltzarkideren laguntza izango luke. Ez nuke esango arriskutsuegia dela, baina zenbait alderdiren jokabideak ikusita, Gobernua gutxienez sei hilabetez babes gabe uztea litzateke, eta hori ez dugu egingo».

Eginarren aburuz, Jaurlaritza osatzeko formulak balio behar luke beste erakundeetan gobernatzeko ere. Halaber, negoziazio prozesu «luzea» iragarri du GBBko lehen-dakariak. «Askok diote negoziazio prozesua denboran asko luza daitekeela. Nik diot ez dela arazorik izango, ezta etenik ere. Halaber, uste dut diputazioetan eta udaletan gobernatzeko balioko duela Jaurlaritzarako



Joseba Egibar eta Juan Jose Ibarretxe Donostian hauteskundeetako ekitaldi batean.

EDURNE KOCH

balio duenak, bestela azkenean arazoak sortuko lirateke».

EHk adierazi berri du ez lukeela begi onez ikusiko sozialistekin edo popularrekin egindako Jaurlaritza. Horri buruz galdetu zioten Egibari, eta erantzun zuen ematen duela ez direla poztuko. Hala ere, jakinarazi zuen bake prozesuan sozialistak sartzea ontzat emango lukeela EHk, eta hori Gobernuan islatu behar dela erantsi zuen.

«Ez EHk bakarrik, EAJk ere uste du datorren Jaurlaritzaren ardatz nagusia bakea dela, eta horrek erabakiko du Jaurlaritzaren eraketa. Beraz, Jaurlaritzan

oso garbi izango dugu bakearen gaia», adierazi zuen.

Gobernuko alderdiez gain, alderdi guztiak bilduz foro bat eratuko dela jakinarazi zuen Egibarrek. «Datozen hilabeteotan» foroa eratuta izatea espero du, eta gai zerrenda «irekia» izango dute mahai gainean. Egibarrek, bestalde, mugimenduak antzeman ditu zenbait alderditan. Esan zuen ETArekin su-etena mesfidantzaz hartu zuten alderdiak jokatzen bide politikoa aldatzen ari direla.

Alderdi bakoitzak bere ikuspuntuari «segurtasunez eta malgutasunez» eutsi behar diolakoan dago Egibar, besteen ikuspun-

tuak ulertzeko modu egokiaren delako. Bestalde, esan zuen ETA-rekin edo EHrekin «isileko itunik» ez duela EAJk. «Demokrazian akordioak mahai gainean jartzen dira. Akordio sekretuek, ez badute politika egiteko balio, gutxirako balioko dute».

Euzkadi Buru Batzarrek (EBB) atzo goizean eginiko bileran aztertu zituen joan den astean Ibarretxe lehendakariari alderdiekin egin elkarrizketak. Horretaz gain, jakina denez, alderdi horrek ostegunean egingo du Batzar Nazionala, Gobernu osaeraren inguruko gaiak eta hauteskundearen emaitzak aztertzeko. X

ABK-k ez du egoki ikusten PP eta PSE Jaurlaritzan egotea

■ Lizarran hartutako bideari jarraitzeko deia egin die alderdi abertzaleei eta IUri

Erredakzioa / Donostia

AUTODETERMINAZIOAREN BILTZARRAK (ABK) ez du egoki ikusten osatuko den Jaurlaritza berria PP eta PSE-EE egotea, «beldurraren botoa erabili baitute hauteskundeetan arma gisa, gizartean zatiketa larria sortzeko arriskuaz».

Aitzitik, ABK-k dei egin zien alderdi abertzaleei eta IUri Lizarra-Garaziko Akordioan jasotzen denarekin kontsekuente izan daitezkeen. Hauteskundeak ezin dute bake prozesua geldiarazi, ABK-en ustez, eta bide hori Lizarran abiatu zela ziurtatzen dute. Beraien iritziz, EAEko Gobernuak ere bide horri eutsi behar dio. X

Bizkaiko boto kontaketa orokorra errekurritu du PPK

Europa Press / Bilbo

ARABA eta Gipuzkoako boto kontaketa atzo behin betiko egin zen arren, Bizkaiko gaur egingo da, PPK errekurritu egin zuelako herrialde horretako boto kontaketa orokorra. Hasiera batean balio gabetu egin ziren PPri emandako hamar boto boligrafo markak zituztelako, baina berriz begiratu ondoren balio garriz jo zituzten.

Beste bi botoren kasuan, hasiera batean EAJri eman zizkieten, baina Gipuzkoako zerrendak zituztenez, kendu egin zizkieten jeltzaleei boto horiek. Kontaketa amaituta ez da aldaketarik izan alderdiei dagozkien eserlekuen banaketan. X

PSEk hauteskundeak eta Gipuzkoako afera aztertu ditu batzorde eragilean

■ Gipuzkoako sozialistek PSOErekiko askatasun gehiago izan nahi dute

Erredakzioa / Bilbo

PSE-EE-K Bilboko egoitzan eginiko batzorde eragilean aztertu zituen azken hauteskundeetako emaitzak, Redondo Terrerosek Juan Jose Ibarretxerekin izan zuen bilera, eta Redondo Terrerosek hauteskunde kanpainen esku artean izan dituen planteamenduekin Gipuzkoako sozialistek dituzten aldeak.

Iragan astean Gipuzkoako sozialistek PSE-EEko exekutibari

azaldu zioten beren egonezina, Redondok kanpainen erabili dituen planteamenduen inguruan batik bat. Gipuzkoako kideek politika euskaltzaleagoa bideratu nahi dute, eta horrek eztabaida sortu du alderdi barruan. Horren adibide da Odon Elortzak, Donostiako alkateak, bere dimisioa aurkeztu izana une batean, ondoren iritziz aldatu bazuen ere.

Gipuzkoako sozialistek eskatu zuten PSE-EEk PSOEtik askatasun gehiago izatea; batez ere,

hauteskunde osteko itunei dagokienez eta bake prozesuari dagokionean.

Bestalde, Redondok Ibarretxerekin, EAEko lehendakariarekin, Gobernua osatzeko elkarrizketetan mintzagai izan zituzten berri jaso zuten alderdi sozialistako buruek. PSE-EEko exekutibak iragan astean aztertu zituen hauteskunde emaitzak, eta batzorde nazionalaren bilera deituko du larunbatean hauteskundearen analisia egiteko. X



Jose Maria Benegas eta Nicolas Redondo atzoko bileran.

SANTIAGO JIMENEZ / EFE